


宋槧太平御覽



太平御覽卷第一百五十五

州郡部一

敘京都上

釋名云都者國君所居人所都會也邑猶俛聚會之稱也
左傳曰邑有先君宗廟之主曰都
尚書大傳曰十邑為都

尚書曰建邦設都

又曰成王在豐欲宅洛邑使邵公先相宅作邵誥惟太保
先周公相宅厥既得卜則經營

毛詩文王受命有此武功既伐于崇遂邑於鄠
周禮大司徒以土圭之法測土深正日景以求地中

又曰四縣為都
又曰距國五百里為都



公羊傳曰京師者天子之居也京者大也師者衆也天子之居必以衆大之辭言之

白虎通曰京師者何謂也千里之邑號也明什倍諸侯法日月之徑千里或曰夏爲夏邑殷爲商邑周爲京師

帝王世紀曰天子畿方千里曰甸服甸服之內曰京師又曰天子所宮曰都

風俗通曰京謂非人力所能成天地性自然也京師義亦取此

帝王世紀曰宓戲爲天子都陳在禹貢豫州之域西望外方東及明緒於周陳胡公所封故春秋傳曰陳太昊之墟也於漢屬淮陽今陳國是也神農氏亦都陳又營曲阜故春秋稱魯大庭氏之庫黃帝都涿鹿於周官幽州之域在漢爲上谷而世本云涿鹿在彭城南然則上谷本名彭城

今上谷有涿鹿縣及蚩尤城阪泉地又有黃帝祠皆黃帝戰蚩尤之處也或曰黃帝都于熊今河南新鄭是也少昊氏自窮桑登位故春秋傳曰世不失職遂濟窮桑登帝在魯北後徙曲阜於周爲魯在禹貢徐州蒙羽之野奎婁之分降婁之次周以封伯禽故春秋傳曰命伯禽而封少昊之墟是以書敘稱魯公伯禽宅曲阜是也顓頊氏自窮桑徙商丘於周爲衛在禹貢冀州太行之東北踰常山及兗州桑土之野營室東壁之分豕韋之次故春秋傳曰衛顓頊之墟也謂之帝丘今東郡濮陽是也帝嚳氏都亳今河南偃師是也禹貢外方之域嵩之北或言在梁非也帝堯氏始封於唐今中山唐縣是也堯山在焉唐水在西北入唐河南有望都縣山卽堯母慶都之所居也相去五十里都山一名豆山北登堯山南望都山故名其縣曰望都而

地理志堯山在唐南山中張晏以堯山實在唐北地理志堯之都後徙涿鹿世本云在彭城南今上谷郡北自有彭城非宋彭城也後又徙晉陽今太原縣也於周禮在并州之域及為天子都平陽於詩風為唐國武王子叔虞封焉更名唐故吳季札聞唐之歌曰思深哉其有陶唐氏之遺民乎帝舜其所營都或言蒲阪即河東縣

帝王世紀曰夏鯀封崇伯故春秋傳曰謂之有崇伯鯀國在秦晉之間左氏傳曰趙穿侵崇是也禹受封為夏伯在禹貢豫州外方南角亢氏之分壽星之次於秦漢屬潁川本韓地今河南陽翟是也受禪都平陽或在安邑或在晉陽於漢平陽安邑皆屬河東晉陽屬太原在冀州太行恒山之西太原太嶽之野參伐之分實沉之次於周為晉今司隸并州之域也相徙商丘於周為衛成公夢唐叔曰相

奪予享是也少康中興復還舊都故春秋傳曰復禹之迹不失舊物是也世本又言夏后居陽城本在大梁之南於戰國大梁魏都今陳留浚儀是也案經傳曰夏與堯舜同在河北冀州之域不在河南也故五子歌曰惟彼陶唐有此冀方今失厥道亂其紀綱乃底滅亡言自禹至太康與唐虞不易都城也然則居陽城者自謂禹避商均時非都也故戰國策稱桀之居左天門之險右天谿之陽成臯在其北伊洛出其南吳起對魏武侯亦言桀之居左河濟右太華伊闕在其南羊腸在其北案地理志上黨商都有天井關即天門也有羊腸坂在太原晉陽西北九十里為通西上郡關即吳起之所云也洛皆在陽城非都審矣帝王世紀曰商契始封於商在禹貢太華之陽上洛商是也世本契居番相徙商丘本顓頊之墟故陶唐氏之火正

闕伯之所居也故春秋傳曰闕伯居商丘祀大火相因之故商主大火謂之辰故辰爲商星今濮陽是也然則契之所封商丘商洛是也商土於周爲衛商是也而學者以商丘爲契封謬矣湯始居亳學者咸以亳本帝嚳之墟在禹貢豫州洛河之間今河南偃師西二十里尸鄉之陽亭是也以爲考之事實甚失其正孟子稱湯居亳與葛爲鄰案地理志今梁國寧陵之葛鄉是也湯地七十里葛又伯耳封域有制葛伯不祀湯使亳衆爲之耕有童子餉食葛伯奪而殺之計寧陵至偃師八百里而使亳衆爲耕童子餉食非其理也今梁自有二亳南亳在穀熟北亳在蒙非偃師也故古文仲虺之誥曰乃葛伯仇餉初征自葛卽孟子之言是也湯又盟諸侯于景亳然則二亳皆在梁矣春秋會于亳是也太甲旣立不明伊尹放諸桐世本又言太甲

從上司馬在鄴西南案詩書太甲無遷都之文桐宮其在斯乎仲丁徙囂或曰今河南之敖倉是也故書序曰仲丁徙于囂河亶甲徙相在河北故書序曰河亶甲居相是也祖乙徙耿爲河所毀故書序曰祖乙圮于耿今河東有耿鄉是也及盤庚立復南居亳之殷地故書序曰將治亳殷今偃師是也然則殷有三亳二亳在梁國一亳在河南南亳偃師卽湯都也蒙爲北亳卽景亳湯所盟地偃師爲西亳卽盤庚所徙者也故立政篇曰三亳坂尹是也武丁徙朝歌於周爲衛今河內縣也紂自朝歌北築沙丘臺沙丘地理志在鉅鹿東北七十里邯鄲國屬趙於禹貢在冀州大陸之野昴畢之分大梁之次至今民俗歌謠男女淫縱猶有紂之餘風世稱趙女之美是也

又曰周后稷始封邰今扶風是也及公劉徙邑於豳今新

太平御覽 卷一百一十五 四
平漆之東北有幽亭是也故詩稱篤公劉于幽斯館至太
王避狄循漆水踰梁山徙邑於岐山之陽西北岐城舊趾
是也故詩稱率西水滸至于岐下南有周原故始改號曰
周王季徙程故書序曰維周王季宅程是也故孟子稱文
王生於畢郢西夷人也暨文王受命徙都於鄠在今京兆
之西是也故稱伐戎於崇作邑於鄠及武王伐紂營洛邑
而定鼎焉今洛陽西南洛水之北有鼎中觀是也周公相
成王以鄠鎬偏處西方貢不均乃使邵公卜居洛水之陽
以即土中故援神契曰八方之廣周洛爲中於是遂築新
邑營定九鼎以爲王之東都之洛邑故周書稱我乃卜澗
水東灋水西唯洛食是爲王城名曰東周故公羊傳曰王
城者何東周也地理志王城本郊鄠之地是以或謂之郊
鄠故春秋傳曰成王定鼎于郊鄠河南是也今郊鄠東門

名鼎門蓋九鼎所徙入也成王既卜營洛邑建明堂朝諸
侯復還鄠鄠故書序曰成王既黜殷命還歸在鄠至懿王
徙犬丘秦謂之廢丘今京兆槐里是也○世本曰懿王居
犬丘厲王淫亂出于彘今河東永安是也平王卽位徙居
洛邑誥所謂新邑也國語曰幽王滅周乃東遷本殷之畿
內在禹貢豫州外方之域河洛灋澗之間周於南柳七星
張之分鶉火之次也及敬王避子朝之亂東居成周故春
秋經曰天王入于成周是也後六年王室定遂徙都成周
是後晉又率諸侯之徙修繕其城以成周城小不受王都
故壞翟泉而廣焉翟泉地在成周東北今洛陽城中有周
王冢是也至赧王又徙居西周而失位
又曰秦非子始封於秦故秦本記稱周孝王曰朕分之土
邑秦本隴西秦谷亭是也立孫莊公徙廢丘周懿王之所

都今槐里是也及襄公始受鄆之地列爲諸侯文公徙汧
故秦本紀曰公東獵至汧乃卜居之今扶風郿縣是也寧
公又都平陽故秦本紀曰寧公二年徙居平陽今扶風郿
之平陽亭是也故秦本紀曰德公元年初居雍今扶風雍
是也至獻公卽位徙治櫟陽今馮翊萬年是也孝公自櫟
陽徙咸陽秦本紀曰作爲咸陽築翼闕徙之及漢元年更
名新城屬扶風後并於長安故太史公傳曰長安故咸陽
也元鼎三年復別爲渭城今長安西北渭水陽有故城故
西京賦曰秦里其朔寔爲咸陽是也

又曰漢高帝元年始爲漢王都南鄭屬漢中秦厲公所置
在禹貢梁州之域北達雍南跨巴蜀與秦同分二年北徙
櫟陽故秦獻公之所居後居萬年故屬馮翊今京兆縣也
都長安秦咸陽之地今京兆所治縣也其城狹小至惠帝

元年始更築廣五年乃成光武以武信侯進封蕭王在禹
貢徐州之域於周以封子姓之別附庸事在春秋於漢屬
豫州今沛國蕭是也及卽位於鄗更名高邑建武元年始
都洛陽故成周之舊基城東西六里一十步南北九里一
百步是以時人謂洛陽爲東京長安爲西京

又曰魏武爲魏公都鄴今魏郡是後文帝因漢之舊復都
洛陽以譙爲先人本國許昌爲漢之所居長安爲西京之
遺迹鄴爲王業之本基與洛陽凡五處故號曰五都
博物志曰河東平陽堯所都河東太陽虞所都太王

潁川陽翟夏禹國弘農陝虢所都王季
河南偃師尸鄉湯所都

魯國薛奚仲所都河南洛陽周公遷殷民曰成周河南武
王遷九鼎周公營之以爲王城平王所都

河南鞏東周所都

扶風槐里周懿王所都

扶風郿邑幽鄉公劉所都

左馮翊櫟陽秦獻公所都

扶風雍秦惠王所都

晉書云晉都洛陽至永嘉南遷居建康今潤州江寧縣宋

齊梁陳並同居建康梁元帝及後梁蕭詧又別居江陵永

嘉之亂有十六國各建都邑前涼張軌都燉煌後涼呂光

都姑臧南涼禿髮烏孤都略陽西涼李暠都酒泉北涼沮

渠蒙遜都張掖前燕慕容廆初都和龍後徙薊又徙鄴後

燕慕容垂都中山南燕慕容德都廣固北燕馮跋都和龍

前秦苻堅後秦姚萇並都長安西秦乞伏國仁都定樂前

趙劉聰都平陽後趙石勒都襄國至石季龍都鄴後蜀李

特都成都夏赫連勃勃都統萬城

又曰永嘉南遷後魏據中原初都代又徙洛陽至文帝遷

長安孝靜帝遷都鄴號東魏西魏東魏禪北齊高洋以鄴

為上都晉陽為下都西魏禪周周禪隋並都長安隋高祖

營大興城後徙居之名曰長安今西京也隋煬帝遷洛陽

於故周之王城對伊闕即今東都城也

太平御覽卷第一百五十五

史記婁敬齊人漢五年戊隴西過雒陽脫輓輅木橫展車前人推之衣其羊裘因齊人虞將軍見上說曰陛下都雒陽豈欲與周室比隆哉上曰然苟曰陛下取天下與周室異周自后稷堯封之邠積德累善十有餘世成王即位而營雒邑以天下中四方貢職道理均有德易以王無德易以亡凡居此者欲令務以德致人不欲依險阻令後世驕奢以虐人也今陛下與項籍戰滎陽爭成臯大戰七十小戰四十使天下之人肝腦塗地暴骨中野欲與成康比隆臣以為不侔矣夫秦被山帶河四塞之固夫與人鬪不搃其喉拊其背未能全勝上疑之及留侯言之上即日車駕西都

太平御覽卷第一百五十六

州郡部二

敘京都下

史記婁敬齊人漢五年戊隴西過雒陽脫輓輅木橫展車前

音胡衣其羊裘因齊人虞將軍見上說曰陛下都雒陽豈

欲與周室比隆哉上曰然苟曰陛下取天下與周室異周

自后稷堯封之邠積德累善十有餘世成王即位而營雒

邑以天下中四方貢職道理均有德易以王無德易以亡

凡居此者欲令務以德致人不欲依險阻令後世驕奢以

虐人也今陛下與項籍戰滎陽爭成臯大戰七十小戰四十

使天下之人肝腦塗地暴骨中野欲與成康比隆臣以

為不侔矣夫秦被山帶河四塞之固夫與人鬪不搃其喉

拊其背未能全勝上疑之及留侯言之上即日車駕西都

賜劾姓劉氏拜郎中號奉春君

漢書曰劉劾說上都關中上疑之左右大臣皆山東人多勸上都雒陽曰雒陽東有成臯西有嶠澠背河向雒其固亦足恃張良曰雒陽雖有此固其中小不過數百里田地薄四面受敵此非用武之國夫關中左嶠函右隴蜀沃野千里南有巴蜀之饒北有胡宛之利阻三面而獨守以一面東制諸侯安定河渭漕輓天下西給京師諸侯有變順流而下足以委輸此所謂金城千里天府之國劉劾說是也上即日車駕西都關中

又曰秦中形勢之國也地勢便利以下兵於諸侯譬如高屋之建瓴水也

又曰翼奉上書曰天道有常王道亡常亡常者所以應有常也必有非常之主然後能立非常之功臣願陛下從都

於成周左據成臯右阻澠池前鄉嵩高後介大河師古曰鄉讀曰

嚮介隔建滎陽扶河東南北千里以為關而又敖倉地方

里者八九足以自娛東厭諸侯之權西遠胡羌之難師古曰厭

抑也音一葉反陛下恭己亡為按成周之居兼盤庚之德

萬歲之後長為高宗

後漢書建武元年冬十月癸丑車駕入洛陽幸南宮却非

殿遂定都洛陽官闕名

又曰時京師脩起宮室濬繕城隍而關中耆老猶望朝廷西顧班固感前代相如壽王東方之徒造構文辭終以諷

勸相如作上林子虛賦吾丘壽王作士大夫論及驃騎將

軍頌東方朔作客難及非有先生論其辭以諷喻為主者乃上兩都賦盛稱洛陽制度之美以折西賓淫侈之論

也又黃琬傳董卓秉政以琬名臣徵為司徒遷太尉更封陽

泉鄉侯卓議遷都長安琬與司徒楊彪同諫不從琬退而

駁議之曰昔周公營洛邑以寧姬光武卜東都以隆漢天之所啓神之所安大業既定豈妄有遷動以虧四海之望也

又曰杜篤以關中表裏山河先帝舊京不宜改營洛邑乃上奏論都賦

又曰王景建初七年遷徐州刺史先是杜篤上論都賦欲令車駕遷還長安耆老聞者皆動懷土之心莫不眷然佇立而望景以宮廟已立恐人情疑惑會時有神雀諸瑞景帝時有神雀鳳皇白虎白鳥等瑞乃作金人論頌洛邑之美天人之符文有可採

又曰陳紀遷侍中出為平原相謁董卓時欲徙都長安乃謂紀曰三輔平敞四面險固土地肥美號為陸海今關東兵起恐洛陽不可久居長安猶有宮室今欲西遷何如紀

曰天子有道守在四夷左傳文宜脩德政以懷不附遷移至尊誠計之末者愚以公宜事委公卿專精外任其有違命則威之以武今關東兵起民不堪命若謙遠朝政率師討伐則塗炭之民庶幾可全若欲徙萬乘以自安將有累卵之危崢嶸之險也卓意甚恨而敬紀名行無所復言

吳錄曰張紘言於孫權曰秣陵楚武王所置名為金陵秦

始皇時望氣者云金陵有王者氣故掘斷連崗改名秣陵

有別小江可以貯舟宜為都邑劉備勸都之自京口遷都

焉吳志先亂時童謠云寧飲建業水不食武昌魚寧歸建

業死不就武昌居乃遷都建業案江表傳漢建安中劉備

勸帝居之初張紘常謁帝曰秣陵者楚威王所置名為金陵

陵地勢尚阜連石頭訪問故老云昔秦始皇東巡會稽經

此縣望氣者云金陵地形有王者都邑之氣故掘斷連崗

改名秣陵今處所見存地有其氣象天之所會今宜為都

邑帝深善之後聞劉備語曰知者意同案吳錄劉備曾使諸葛亮至京因觀秣陵山阜歎曰鍾山龍盤石頭虎踞此

帝王之宅

晉書周馥成都王穎以為河南尹馥觀洛陽孤危乃建策迎天子都壽春日不圖厄運戎狄交侵畿甸危逼僉以殷人有屢遷之事周王有岐山之徙方今河朔蕭條峭函阻澁宛都屢敗江漢多虞淮陽之地北阻塗山南枕靈岳名州四帶有重險之固運漕四通無空窻之難雖聖上神聰元輔明賢居儉守約用保宗廟未若相土遷宅以保永祚也

載記曰劉元海之僭太史令宣于脩之言於元海曰陛下鳳翔龍興奄受大命然皇居仄陋非可久安平陽勢有紫氣兼陶唐舊都願陛下上迎乾象下協坤祥乃遷都平陽又石勒下令曰武都吾之豐沛萬歲之後魂魄歸之初張賓謂勒曰今天下鼎沸戰爭方始夫得地者昌失地者亡

邯鄲襄國趙之舊都依山憑險形勝之國可擇此二國而都之然後命將四出授以奇略推亡固存兼弱攻昧王業成矣遂據襄國又符堅自臨晉登龍門顧謂羣臣曰美哉山河之固婁劼有言關中四塞之國真不虛矣權翼對曰臣聞夏殷之都非不險也周秦之衆非不多也終於身殞南巢首懸白旗軀殘於犬戎國分於項籍何也德不修故也吳起有云在德不在險願陛下守之以德山河之固不足恃也○江表傳曰孫皓欲徙都武昌揚土百姓訟流供給以為患陸凱上疏曰臣聞有道之君以樂樂人無道之君以樂樂身樂人者其樂弥長樂身者不久而亡民者國之根也誠宜重其食愛其命民安則君樂矣又武昌土地危險磽确非王者都安國養民之處船舶則沈漂陸居則峻危且童謠曰寧飲建業水不食武昌魚寧還建業死不

就武昌居臣聞翼星爲祥熒惑作妖童謠之言發自天心也
後魏書文帝泰和十八年卜遷都鄴登銅雀臺魏御史大夫崔吉等曰鄴城平原千里運漕四通有西門吳起舊迹可以饒富在德不在險請都之孝文曰君知其一未知其二鄴城非長久之地石虎傾於前慕容滅於後國富主奢暴成速敗且西有枉人山東有列人縣北有柏人城君子不飲盜泉惡其名也遂止乃都洛陽

三國典略梁元帝在江陵卽位欲還都建康領軍將軍胡僧祐太府卿黃羅漢吏部尙書宗懔御史中丞劉諫等曰建業王氣已盡與虞止隔一江若有不虞悔無及也且渚宮洲數滿百當出天子陛下龍飛是其應乎梁主令朝臣議之黃門侍郎周弘正尙書左僕射王褒曰帝王所都本

無定處其如黔首萬姓未見輿駕入建業謂是列國諸王宜順百姓之心從四海之望時江陵人士咸云弘正等皆是東人志願東下恐非良計弘正面折之曰若東人勸東謂爲非計君等西人欲西豈成良策梁主笑之又於後堂大會文武五百人問之曰吾欲還建業諸卿以爲何如衆皆愕然莫敢先對梁主曰勸吾去者左袒於是左袒者過半武昌太守宋買臣入勸梁主云建業舊都瑩陵猶在荆鎮邊疆非王者宅願陛下弗疑致後悔也臣家在荊州豈不願陛下住但恐是臣富貴非陛下富貴耳乃召卜者杜景豪決其去留遇兆不吉荅云未去景豪退而言曰此兆爲鬼賊所留也

五經要義曰王者受命創始建國立都必居中土所以摠天地之和據陰陽之正均統四方以制萬國者也

王嬰古今通論曰崑崙東南方五千里謂之神州州中有和
和美鄉方三千里五岳之城帝王之宅聖人所生也

鹽鐵論曰燕之涿薊趙之邯鄲魏之温軹韓之滎陽齊之
臨淄楚之宛陳鄭之陽翟三川之二周富冠海內皆為天
下之名都

世說曰謝公時兵廝養逋亡多外竄在南塘下諸船中或
欲求一時搜索謝公不許云若不容置此輩何以為京師
譙周法訓曰王者居中國何也順天之和而同四方之統
也

管子曰凡立國都非太山之下必廣州之上高無近旱而
水用足下無近水而溝防省因天材就地利故城郭不必
中規矩道路不必中准繩

山海經曰青要之山實惟帝之密都郭璞注曰大帝曲密之邑

又曰帝之下都崑崙之墟

又曰從極之深三百仞唯冰夷都焉冰夷河伯

尸子曰舜一徙成邑再徙成都三徙成國堯聞之賢舉之
草茅之中與之語禮樂而不逆與之語政至簡而易行與
之語道廣大而不窮於是妻之以皇媵之以娥九子事之
而託天下焉

帝王世紀曰古公亶父是為大王以脩德百姓為所附狄
人攻之以皮幣事之不得免焉又事之以玉帛不得免焉
又事之以犬馬不得免焉遂策杖而去止於岐山之陽邑
于周地故始改國曰周幽人聞之曰仁人不可失也東循
而奔從之者如歸市焉一年而成三千戶之邑二年而成
都三年五倍其初王於是改戎俗築城郭立宗廟設官司
即詩所謂乃召司空乃召司徒俾立室家其繩則直作廟

翼翼築之登登削屢馮馮者也周道之端蓋自此始
兩京記西京隋文帝開皇二年夏自故都移今所帝以長
安故城漢來舊邑宮宇蠹朽謀欲遷都僕射蘇威等議合
帝旨太史令庾季才奏當遷都帝曰吾乃今知天道開皇
二年六月十八日移入新邑在漢故城之東南萬年縣界
南直終南山子午谷北枕龍首原今朝堂卽舊楊興村村
門大樹今見在初周代有異僧名根公言詞多驗時村人
於此樹下集根公忽來逐之曰此天子坐位何故坐之左
僕射高穎摠領其事太子左庶子宇文愷創製規模謂之
大興城隋文初封大興公及登極縣門園池多取其名宮
城東西十一里南北二里四十步周迴十三里一百八十
步高三丈五尺
又曰東都城隋大業元年自故都移於今所其地今周之

王城自周赧王後漢並居於今之故都至仁壽四年隋文
帝於此營建初謂之東京有詣闕言事者稱一帝二京事
非稽古乃改爲東都爲王世充所據充平改爲洛州惣管
府尋又置陝東大行臺武德九年復爲洛州都督府貞觀
六年改爲東都舊宮爲洛陽宮明慶元年復爲東都武太
后號爲神都神龍元年復舊又改爲河南府洛水貫都有
河漢之象初隋煬帝登北邙觀伊闕顧曰此龍門耶自古
何爲不建都於此僕射蘇威對曰自古非不知以俟陛下
帝大悅然其地北據山麓南望天闕水木滋茂川源形勝
自古都邑莫有此也
又曰太宗車駕始幸洛陽宮唯因舊宮無所改製終於貞
觀永徽之間荒蕪虛耗置都之後方漸修補龍朔中詔司
農少卿韋機更繕造高宗常謂機曰兩京朕東西二宅來

去不恒卿宜善思修建始作上陽等宮至武太后遂定都於此日已營構而官府備矣

郡國誌廬山在柴桑彭澤二縣之郊疊障九成崇巖萬仞山海經所謂三天子障亦曰天子都

揚雄蜀都賦曰蜀都之地古曰梁州

張衡南都賦曰於顯樂都既麗且康陪京之南居漢之陽

魯都賦曰彼齊諸儒皆縉弁端衣散佩垂紳金聲玉色温

故知新訪魯都之區域吊先王之遺真

左思蜀都賦曰蓋兆基於上世開國於中古廓靈關而為

門苞玉壘而為宇

又曰魏土者畢昴之所應虞夏之餘民先王之桑梓列聖

遺塵考之四輿則八紘之中測之寒暑則霜露所均

後漢杜篤論都賦夫大漢之盛代藉雍土之饒得御外理

內之術孰能致功若斯創業於高祖嗣傳於孝惠德隆於

太宗財衍於孝景威盛於聖武政行於宣元侈極於成哀

祚缺於孝平傳代十一歷載三百高祖至平帝十一代歷

此言三百者謂出德衰而復盈道微而復彰謂呂氏亂而

廢而宣皆莫能遷於雍州而背於咸陽宮室寢廟山陵相

望高顯弘麗可思可榮羲農已來無茲著明夫雍州本帝

皇所以育業周始祖后稷封郤公劉居邠大王居岐文霸

王所以行功戰士角難之場也衍庸也謂秦

太平御覽卷第一百五十六

五河以治此邦十... 皇風以香... 聖高... 二... 太宗... 丙...

太平御覽卷第一百五十七

州郡部三

敘州

敘州

敘郡

敘縣 邑鄉黨間里坊隣附

釋名曰州注也郡國所注仰

說文曰州疇也疇其土而生之

河圖括地象曰長城者為州

又曰崑崙東南地方五千里名神州中有五山帝王居之

又曰天有九道地有九州天有九部八紀地有九州八柱

河圖曰九州殊題水泉剛柔各異青徐角羽集寬舒遲人

聲緩其泉鹹以酸荆揚角徵會氣漂輕人聲急其泉酸以

苦梁州商徵接剛勇漂人聲騫其泉苦以辛兗豫宮徵合

平靜有慮人聲端其泉甘以苦雍冀商羽合端駮烈人聲

捷其泉辛以鹹

尚書舜典曰肇十有二州范甯注曰禹平水土置九州舜州分齊為營州始為十二州

又湯誓曰以有九有之師爰革夏政九州有者九州也

尚書大傳曰古之處師八家而為鄰三鄰而為朋三朋而為里五里而為邑十邑而為都十都而為師州有十師焉

鄭玄注曰州凡四十三萬二千家此蓋虞夏之數也

毛詩商頌曰帝命式于九圍九圍州也

詩含神務曰邛邛衛王鄭此五國者千里之城處州之中

名曰地軸

周禮地官大司徒曰五黨為州使之相賙鄭玄注曰州二千五百家賙其

乏五州為鄉使之相賔

又春官下保章氏曰以星土辨九州之地所封之域皆有

分星以觀妖祥

又夏官下職方曰職方氏掌天下之圖以掌天下之地辨

其邦國都鄙天下之圖如今司空輿地圖乃辨九州之圖使同貫利事

禮記王制曰凡四海之內九州州方千里

春秋說題辭曰州之言殊也合同類異其界也

爾雅曰兩河閒曰冀州自東河至西河河南曰豫州自河南至漢也河西

曰雍州自黑水西漢南曰荊州自漢南至衡山之陽江南曰揚州自江

海濟河閒曰兖州自河東至濟也濟東曰徐州自濟東至海也燕曰幽州

自易水至北狄齊曰營州自岱東至海

孝經援神契曰計校九州之別土壤山陵大川澤所注萊

沛所生鳥獸所聚九百一十一萬八千二十四頃言民少不足以盡地

利萊沛水傍漸如不可耕者磽确不墾者其餘隄封千五百萬二千頃

論語摘輔象曰兗豫屬上台九州繫於三台荆揚屬下級下級下等

有一台各雍梁屬中上之台冀州屬錯之錯雜也屬中台青州屬下上之台徐州屬下下之台

五經異義曰地有九州足以承天

史記曰鄒衍云中國於天下乃八十一分之一耳中國名赤縣州內自有九州禹之序九州是也不得為州數中國外如赤縣州者有九乃謂九州也於是有裨海環之人民禽獸莫能相通也如一區中者乃為一州如此者九乃有大瀛海環其外天地之際焉

後漢書曰獻帝建安十八年復禹貢九州獻帝春秋日時省幽并州以其郡國併於冀州省司隸校尉及涼州郡國以併於雍州省交州荆益州於是

有兗豫梁青荆揚冀益雍九數雖同禹然梁益亦一地也○又曰順帝時李同上書曰夫天下之大譬一人之身本朝者心腹也州郡者四支也心腹病則四支不舉故臣之憂在心腹之疾非四支之患

應劭漢官儀曰孝武皇帝南平百越北攘戎狄置交阯朔方之州復徐梁之地改雍曰梁改梁曰益凡十三州所以交朔獨不稱州明示帝王未必相襲始開北方遂交南方為子孫基阯也

漢官解詁曰冀趙常山胡廣注曰經曰冀州既載居趙國今治常山兗衛濟河

經曰濟河惟兗州青齊海岱經曰海岱惟青州徐魯淮沂

其又居魯國今居豫州而治東海揚吳彭蠡揚州又曰彭

蠡既居吳荆楚衡陽州居楚國及衡陽惟荆益庸岷梁

華陽黑水惟梁州漢改涼邠黑水居邠國漢改雍州為邠

州國右扶風州今治漢屬司雍別朔方漢朔方刺史之地交阯

南越漢平南越之地置交阯幽燕朝鮮經無幽州而周官

居燕國今并代晉翟之別也居燕國今廣陽是淮南子曰天地之間九州八柱

又曰九州大統方千里九州之外乃有八寅亦千里

又曰何謂九州東南神州曰晨土東南晨為農祥后稷所經緯也故曰晨土也

正南次州曰沃土沃盛也五月建午西南戎州曰滔土滔也七月建申萬物稼穡長故曰沃土

正西次州曰并土并猶成八月建酉百

正中冀州曰中土冀大也為四方西北括州曰肥土正北

濟州曰成土東薄州曰隱土薄猶平也陰氣所

揚州曰申土申復也陰氣盡所隱伏也東

輿地志曰周成王時周公作輔定官分職改禹九州以徐

梁合之於青分冀州之域為幽并二州

風俗通曰周禮五黨為州州疇也州有長使之相周足也

物理論曰九州變易交錯不同禹貢有梁州無并州周官

有并州無梁州爾雅有營州無青州漢興武帝開拓三方

立十三州通并梁之數而增交益焉○太一式占周公城

名錄曰黃帝受命風后受圖割地布九州置十二圖

張衡靈憲曰崑崙東南有赤縣之州風雨有時寒暑有節

苟非此土南則多暑北則多寒東則多陽西則多陰故聖

王不處焉

敘郡

釋名曰郡群也人所群聚也秦改諸侯置郡縣隨其所在

山川土形而立其名

史記曰秦始皇廢五等之爵立郡縣之官以公國為大以

侯伯為小大郡曰守小郡曰都尉

漢書地理志曰漢孝平時凡郡國一百三十二侯國二百

四十一

又曰六郡者金城隴西天水安定北地上郡也

續漢書郡國志曰光武中興命併省郡國明章和至于順

帝凡郡國一百五仍為十三郡

又日光武以官多役煩乃併省郡國十九縣道侯國四百

餘所後為十三州部司隸理河南今洛陽豫州理洛陽今亳兗

州理昌邑今兗州金鄉縣徐州理剡今泗州下邳縣青州理臨淄今青州臨淄縣

涼州理隴今秦州隴城縣并州理晉陽今太原原冀州理鄆音郝今趙州高邑縣

幽州理薊今幽州薊縣楊州理歷陽今和州縣荊州理漢壽今郎州武陵縣

交州理廣信今梧州蒼梧縣至于末加置郡國百有五凡縣道侯

國千一百八十東有樂浪郡西有燉煌郡南有日南郡北

有鴈門郡西南有永昌郡廣袤如前漢

通典曰秦始皇帝併天下分置三十六郡三十六者三川河東南陽南郡

九江鄣郡會稽潁川碭郡泗水薛郡東郡瑯琊齊郡上谷

漢陽右北平遼西遼東代郡鉅鹿邯鄲上黨太原雲中五

原鴈門上郡隴西北地漢中巴郡蜀郡黔郡各領縣縣萬

戶已上為令減萬戶為長平百越又置四郡閩中南海合桂林象郡

四十郡置一守一丞兩尉以典之監侍御史掌監諸郡漢

有天下王侯郡國並置焉迄于平帝戶口繁息凡新置郡

國六十七與秦三十六合一百三改周雍州曰涼州復置

夏之徐梁二州而改梁曰益北置朔方南有交趾別置二

刺史凡十三部涼益荆揚青豫兗徐幽并冀十一州交趾

州一

又日後漢魏武輔政吳蜀三方鼎峙疆場不定建安中置

郡十二新興樂平西平新平略陽陰平帶方譙郡樂陵章

漁陽盧江武帝受禪又置七郡朝歌陽平弋陽魏興至明

帝置六郡平公孫度得遼西遼東帶方少帝又置平陽一

郡并得漢舊郡國五十四平蜀得二十郡劉備初置郡九

江陽汶山漢嘉朱提雲南涪陵并得漢舊巴郡廣晉太康

平吳之後天下一統荆揚也郡四十三凡州十六太康地

冀充豫荆揚徐青幽并雍涼梁益交廣也晉自湯陰敗後羌羯交侵至乎劉曜陷洛陽於是司冀雍涼青并充豫幽平秦營十二州並淪沒矣後魏孝文帝都洛陽開拓土宇明帝熙平元年凡州四十六鎮十二郡國二百八十九矣天平年凡州六十八至武定年凡州一百一十一郡五百一十九周明帝受魏禪至大象二年凡州二百一十一隋文帝受周禪至開皇三年罷天下郡其縣但隸州而已九年平陳已後四海一家大業三年罷州為郡四年大簿凡郡國一百八十三唐貞觀十三年大簿凡州府三百五十八敘之為十道應劭漢官儀曰秦用李斯議分天下為三十六郡凡郡或以列國陳魯齊吳是也或以舊邑長沙丹陽是也或以山陵太山山陽是也或以川源西河河東是也或以所出金城城下有金酒泉泉味如酒豫章章樹生庭中鴈門鴈之

所育是也或以號令禹合諸侯大計東冶之山會稽是也京兆絕高曰京京大也十億曰兆欲令帝都殷盈也左輔右弼蕃翊承風也張掖始開垂張臂掖也黃恭十四州記曰秦兼天下始皇二十六年廢五等之爵立郡縣之官以公國為大侯伯為小大郡曰守小郡曰都尉都尉之言君改公侯之封而言君者君至尊也言郡守專權君臣之禮更崇也今之郡字君在其左邑在其右君為元首邑以載民故取名於君而謂之郡也風俗通曰周制天子方千里分為百縣縣有四郡故左氏傳曰士大夫受縣下大夫受郡

敘縣

釋名曰縣懸也懸係於郡也說文曰縣邑也從口已聲

周書曰郊田方六百里因四土為方千里分以百縣縣有四郡郡有鄙鄙不過百室以便野事

周禮地官遂人曰五家為鄰五鄰為里四里為鄣五鄣為鄙五鄙為縣五縣為遂夫受

禮記王制曰天子之縣內方百里之國九七十里之國二十有一五十里之國六十有三凡九十三國縣內夏時天子所居州界也

黃恭十四州記曰縣萬戶以上為令則子國也千戶為長男國也今人呼縣為百里子男本方百里也故言今之百里古之諸侯

又曰縣者紘也言施繩用法狀如絃絃聲近縣故以取名風俗通曰周禮百里曰同所以獎王室協風俗摠名縣縣

立也言當立靜平徭役

邑附

尚書大傳曰五里為邑

周禮地官曰四井為邑

易訟卦曰逋其邑人三百戶

周書曰周公乃作大邑于成周

左傳曰凡邑有宗廟先君之主曰都無曰邑

穀梁傳曰齊人取子糾殺之十室之邑可以隱死以千乘之魯而不能存子糾公為病矣

論語曰十室之邑必有忠信如丘者焉不如丘之好學也史記曰黃帝邑于涿鹿之阿遷徙無常處以兵師為營衛

張華詩曰駕言遊東邑東邑紛穰穰婚姻及良時嫁娶避當梁

鄉附

釋名曰鄉向也衆所向也

周禮地官司徒曰五州爲鄉使之相賓

論語曰孔子於鄉黨恂恂如也似不能言者

又曰互鄉難與言童子見門人惑

後漢書曰張湛爲左馮翊告歸平陵望寺門而步主簿進

曰明府位尊德重不宜自輕湛曰禮下公門軾路馬孔子

於鄉黨恂恂如也父母之國所宜盡禮何謂輕哉

唐書曰張道源并州祁人也年十五父死居喪以孝行稱

縣令郭湛改其所居爲復禮鄉至孝里

老子曰以鄉觀鄉

莊子曰遊於無何有之鄉

鄭玄別傳曰國相孔文舉教高密縣曰公者人德之正號

不必三事大夫也今鄭君鄉宜曰鄭公鄉

黃恭交廣記曰秦兼天下改附庸爲鄉鄉則有族今裔夫

是也鄉之言境言其在人境域內非天下所置故言鄉

零陵先賢傳曰鄭產泉陵人爲白土裔夫漢末產子一歲

輒出口錢民多不舉產乃勅民勿得殺子口錢自當代出

因名其鄉曰更生鄉

萬歲曆曰黃武六年正月獲彭綺是歲由拳西鄉有產兒

墮便語云大方明河欲清鼎脚折金乃生於是因曰語兒鄉

郡國志曰秭歸縣屈原鄉里南岸曰歸鄉西岸曰秭歸屈

原旣放薶歸鄉里因曰歸鄉縣屈原婦女須聞原還亦來

喻之因曰姊歸

王子年拾遺錄曰張掖郡郵奇字君玠居喪盡禮以淚灑

石石卽成痕著枯木枯草在冬必茂渡地成鹹俗謂之鹹

鄉漢帝嘉其孝異表銘其邑改曰孝行之鄉歲時使立廟

祭祀

黨附

周禮地官司徒曰四閭為族使之相葬五族為黨使之相助

釋名曰五百家為黨黨長也一聚所尊長也

閭附

周禮地官司徒曰五家為比使之相保五比為閭使之相受
說文曰閭里門也周禮五比為閭閭侶也二十五家相群
侶也

尚書曰武王克商軾商容閭

苑曄後漢書曰表忠子祕為郡門下議生黃巾起祕從太
守趙謙擊之軍敗祕與功曹封觀等七人以身扞刃皆死
於陣謙以得免詔復祕等閭號曰七賢閭

戰國策曰王孫假年十五齊閔王之出走失王之處其母

曰汝朝出而晚來則吾倚閭而望汝

又曰齊桓公宮中七市女閭七百管仲故為三歸之家以

掩桓公之罪

呂氏春秋曰魏文侯過段干木之閭而軾之

里附

周禮地官遂人曰五家為隣五隣為里

風俗通曰里者止也五十家共居止也

禮記曲禮上曰里有嬪不巷歌

春秋潛潭巴曰里社鳴此里有聖人

論語曰里仁為美

又曰東里子產潤色之

論語撰孝識曰里名勝奴曾子斂襟

漢書曰禮古經者出魯淹中
又曰盧縮與高祖同里開
又曰宣帝舍長安尚冠里

東觀漢記曰鮑永字君長為魯郡太守時彭豐等不肯降
後孔子闕里無故荆棘自闕從講室掃除至孔里永異之
召郡府丞謂曰方今阨急而闕里無故自滌意豈夫子欲
令太守大行饗誅無狀也乃修學校禮請豐等會手格殺
之

張璠漢記曰荀爽兄弟八人時人謂之八龍舊居西豪里
縣冷苑康曰昔高陽氏有才于八人署其里曰高陽里
宋書曰太原王知玄者僑居會稽剡縣居家以孝聞及丁
憂哀毀而卒帝嘉之詔改所居青苦里為孝家里
宋略曰張敷幼樹風規貞心簡立居喪滅性孝道淳深宜

追甄異以旌厥美可改所居里曰孝張里

又曰散騎常侍表瑜薦會稽郭世道詔改所居曰孝行里
又曰太祖十三年春鳳皇見于京師眾鳥隨之改其地曰
鳳皇里

唐書曰劉禕之貞觀元年詔追入京以母老固辭太宗許
其終養江南道大使李襲譽嘉其至孝賜以米帛因上表
旌其門閭改所居為孝慈里

典略曰衛襄字叔遼河東人也修行至孝州郡嘉之改其
里謂之孝德里

晉宮閣名曰洛陽城中諸里年和里宜壽里永年里宜都
里太學里富儲里德官里大雅里孝敬里永安里安城里
左池里東臺里安民里延壽里日中里步廣里西園里東
半里穀陽里北恢里安武里孝西里太始里光林里石市

里宜秋里葛西里西河里宜賜里延壽里攸陽里南孝里
中恢里宜年里渭陽里利民里西樂里北溪里西義里東
統里宜都里石羊里中安里石池里
潘岳西征賦曰所謂尚冠修城河棘宣明建陽昌陰北煥
南平皆夷漫滌蕩亡其處而有其名注云皆里名也

杜祭酒別傳曰桓宣武館于赤蘭橋南曰延賢里
荆州記曰峴山南至宜城百餘里舊說其閒雕墻崇峻漢
靈帝末其中有卿士刺史二千石數十人朱轅軒耀華蓋
接陰同會於太山廟下荆州刺史行部見之雅難其盛勅
懸號為冠蓋里

荆州圖記曰秭歸縣北有屈原故宅方七頃累石為屋今
其名樂平里
伏琛齊地記曰臨淄有梧臺里

益州記曰州南蜀時故錦澗也其處號錦里

伍輯之從征記曰譙周云孔子後魯人就冢次而居者百
有餘家曰孔里
郡國志曰齊臨淄縣東有陰陽里諸葛亮梁甫吟云步出
齊城門遙望陰陽里里內有三墳纍纍皆相似借問誰家
墳田疆古治子
會稽典錄曰陳囂與民紀伯為鄰伯夜竊藩囂地自益囂
見之伺伯去後密枝其藩一丈以地益伯伯覺之慙惶既
還所侵又却一丈太守周府君高囂德義刻石旌表其間
號曰義里

坊附

漢宮閣名曰洛陽故北宮有九子坊
晉宮閣名曰洛陽宮有顯昌坊脩成坊綏福坊延祿坊休

勸坊承慶坊桂芬坊椒房坊舒蘭坊藝文坊
尚書曰睦乃四隣以蕃王室
毛詩曰協比其鄰

周禮五家為鄰五鄰為里

周易曰東鄰殺牛不如西鄰之禴祭

左傳僖公曰弃德不祥怒鄰不義

又曰弃信背鄰患孰恤之

又曰救災恤鄰天之道也

又桓公曰親仁善鄰國之寶也

又昭元年曰晏子如晉景公使更其宅還而毀之日諺曰

非宅是也唯鄰是也

又曰諸侯守在四鄰

語曰孰謂微生高直或乞醢焉乞諸其鄰而與之

又曰德不孤必有鄰

後漢書曰張霸字伯饒博覽五經諸生孫林劉固段著等

慕之皆市宅其旁以就學焉

南史曰宋季雅市宅在呂僧珍宅側呂問宅價曰千一百萬呂惟其貴宋曰一百萬買宅千萬買鄰也

太平御覽卷第一百五十七

天曰... 其... 漢書曰... 魏書曰... 後漢書曰... 明帝永平十五年東巡至大梁

太平御覽卷第一百五十八

州郡部四

河南道上

東京開封府

東京開封府

西京河南府

陝州

元和郡國志曰禹貢兗州之域春秋時為鄭地戰國時為

魏都

史記曰魏惠王自安邑里徙大梁今浚義縣按後漢書大梁城魏惠王所築

漢書曰酈食其說高祖曰陳留天下之衝四通五達之郊

也

又曰文帝以皇子武為梁王都大梁後東徙睢陽注曰睢陽今宋

也

後漢書曰明帝永平十五年東巡至大梁

春秋後語曰蘇秦去韓之魏說襄王曰大王之地南有鴻溝陳留汝南鄆邵陵舞陽新都東譙潁潁棗無䟽鴻溝今潁今潁州棗今曹州宛句西有長蛇之地史記作長城地無䟽或作无肯未詳所在長城有北有河水卷燕酸棗地方于里田舍廬廡之數無所不畜牧人民之衆牛馬之多夜行不絕輪輪躬躬車馬聲也宏夫魏天下之強國也王天下之賢王也郡國志曰東魏孝靜帝以此置梁州周宣帝改爲汴州以其臨汴水爲名也隋大業十三年州廢以開封浚儀屬鄭州隋亂陷賊唐武德四年平王世充復置汴州五代史曰梁開平元年梁祖初開國升汴州爲開封府建名東京元管開封浚儀陳留雍丘封丘尉氏六縣至是割滑州之酸棗長垣鄭州之中牟武陽宋州之襄邑曹州之戴邑許州之扶溝陽陵陳州之太康九縣隸焉後唐復降

爲汴州以宣武軍爲額其武陽長垣扶溝考城等四縣仍且隸汴州其餘五縣却還本部晉天福中復升爲東京復以前五縣隸之漢周並因之

太康地記曰豫州之分其人得中和之氣性安舒其俗阜其人和今俗多寬慢

漢志曰開封逢池在東北或曰宋之逢澤也瓚曰汲郡古文梁惠王廢逢忌之藪以賜民今浚儀是也

史記曰王稽與范雎言曰先生侍我于三亭之南三亭今屬浚儀陳留風俗傳曰阮簡爲開封令有劫賊外白甚急簡方圍

綦長嘯曰局上有劫甚急徐廣史記音義曰秦孝公會諸侯於蓬澤○圖經曰浚儀

有高陽故城顛頊高陽氏佐少昊有功封於此城又曰浚儀有信陵亭在城內即魏公子無忌勝槩之地

左傳曰韓起送女於楚還過鄭鄭伯勞諸圉今圍城是也

漢志曰陳留郡鄭邑後為陳所併故曰陳留瓚曰宋亦有留彭城留是也留屬陳故稱陳留也

古史考曰伊尹生於空桑陳留有空桑故城

家語曰孔子南遊於楚至阿谷之隧使子貢奉觴從女子乞飲今陳留有阿谷水

漢志曰雍丘屬陳留故杞國周武王封禹後東樓公

左傳曰衛侯伐鄭至于鳴鴈在雍丘有鳴鴈亭

左傳曰齊桓公會諸侯于葵丘今在雍丘縣

漢志曰東昏陳留郡莽改曰東明

又曰襄邑屬陳留有服官莽曰襄平師古曰襄邑宋地本承匡襄陵鄉宋襄公所葬故曰襄陵秦始皇以承匡卑濕故徙縣於襄陵謂之襄邑縣○陳留風俗傳曰襄邑縣南

有渙水睢水傳曰睢渙之水出文章故有黼黻藻錦日月

華蟲以奉天子宗廟御服焉

左傳曰宣二年鄭破宋師于大棘杜預曰在襄邑

後漢地理志曰陳留郡已吾有大棘鄉

國都記云封丘衛地故燕之延鄉也高祖與項羽戰戰於

延鄉有翟母免其難故以延鄉封翟母焉

漢志曰封丘屬陳留郡孟康曰春秋時敗翟于長丘今翟

溝是也

漢志曰尉氏屬陳留郡應劭曰古獄官曰尉氏鄭之別邑

也瓚曰鄭大夫尉氏之邑遂以為邑師古曰鄭大夫尉氏

亦以掌獄之官故以為族耳

後漢地理志曰陳留郡尉氏有陵樹鄉鄉北有澤澤有天

子苑園有秦樂廡漢以馴養猛獸

漢志曰外黃屬陳留郡張晏曰魏郡有內黃故加外耳瓚曰縣有黃溝故依之也

左傳曰惠公敗宋師于黃杜注外黃縣東有黃城

陳留風俗傳曰沛公起兵野戰喪皇妣於皇鄉天下平定乃使使者以梓官招魂於野有丹蛇自洒濯入梓官其浴

處仍有遺髮其處在小黃屬陳留

漢志曰長垣屬陳留郡莽曰長固

孟康曰春秋會于匡今匡城是

晉地道記云長垣古衛故匡城地孔子所厄處也

地道記曰承匡城在縣西左傳文十一年會晉卻缺于承

匡是也

漢志曰鄆屬陳留莽曰順通

左傳隱公曰鄭伯克段于鄆

又鄭太叔侵鄭至于廩延注曰縣北有延津後漢地理志

曰即酸棗也

戰國策云齊欲發卒取周九鼎顏率曰夫梁之君臣欲得

九鼎謀於沙海之上為日久矣沙海屬浚儀

陳留風俗傳曰縣有蒼頡師曠城其城有列仙吹臺梁王

增築之以為吹臺俗號繁臺

史記曰大梁城有十二門東門曰夷門隱士侯嬴年七十

家貧為大梁夷門抱關者魏公子無忌厚遺之不肯受

水經曰大禹塞滎陽澤開渠以通淮泗名葦荇渠即汴渠

也漢平帝時汴河決壞後漢明帝遣使者修治汴渠至隋

大業中更令開導名通濟渠引河水入汴口自大梁之東

引入泗連于淮至江都宮入于海亦謂之御河河畔築御

道植柳楊帝巡幸乘龍舟而往江都自揚益湘南至交廣

閩中公私漕運商旅軸轡相接五滸自出益臨南運交
隋書曰大業元年以汴水迂曲迴復稍難自大梁城西南
鑿渠引汴水入號通濟渠水入汴水入汴水入汴水

西京河南府

十道志曰洛州周之舊都禹貢豫州之域

尚書洛誥曰召公既相宅周公往營成周使來告卜作洛

誥予惟乙卯朝至于洛師我卜河朔黎水我乃卜澗水東

澗水西惟洛食又卜澗水東亦惟洛食言先卜河北黎水不吉又卜澗澗之

間乃吉

周禮司徒職曰以土圭之法測土深正日景以求地中日

南則景短多暑日北則景長多寒日東則景夕多風日西

則景朝多陰日至之景尺有五寸謂之地中天地之所合

也四時之所交也風雨之所會也陰陽之所和也然則百

物阜安乃建王國焉

又曰午為鶉火周之分野自柳九度至張十七度七星周

之分野

周書曰周公將致政乃作大邑于洛北因邙山以為天下

之湊也

孝經援神契曰八方之廣周洛為中於是遂築新邑營定

九鼎以為王之東都

漢書曰高祖欲都洛陽成卒婁敬求見上曰陛下都洛陽

欲與周室比隆哉上曰然敬曰陛下取天下與周室異周

之先自后稷積德十餘世公劉避桀居豳大王以狄伐故

去豳之岐國人爭歸之文王為西伯武王伐紂八百諸侯

不期而會成王即位周公之屬輔相焉乃營成周於洛邑

以為天下中四方納貢道里均有德則易以玉無德則易

以亡凡居此者欲務以德致人不令後世驕奢以虐民也及周之衰乃分爲二天下莫朝周不能制形勢弱也今陛下用兵取天下百姓肝腦塗地而欲比隆周室臣以爲不侔矣不如都秦帝以問張良良曰洛陽雖險其中不過百里四面受敵此非用武之國不如都關中婁敬之說是也博物志曰周在中樞三河之分風雨所起四險之國武王克殷定鼎郊廓以爲東都

皇甫謐帝王世紀曰周公相成王以鄠鎬偏在西方職貢不均乃使邵公卜居洛水之陽以卽中土

元和郡縣志曰河南府三代皆爲都邑周公營之爲成周秦爲三川郡漢爲河南郡後漢光武都之

左傳曰初平王東遷辛有適伊川見被髮而祭於野者曰不及百年此其戎乎其禮先亡矣

帝王世紀曰周襄王十五年秦晉遷陸渾之戎于伊川果驗辛有之言

又曰晉趙鞅納王使汝寬守闕塞服虔曰闕塞南山伊闕也

史記曰秦武王謂甘茂曰寡人欲通三川以窺周室死且不朽矣

漢志曰雒陽周公遷殷民是爲成周春秋昭二十二年晉合諸侯于狄泉以其地大成周之城王莽曰宜陽

後漢書曰時天下墾田不以實戶口互有增減詔下郡國檢覆其事而州郡多不均平百姓嗟怨帝見陳留牘上有書視之云潁川弘農可問河南南陽不可問帝怒時顯宗爲東海公年十二言曰吏受郡勅當欲以墾田相方耳帝問曰何故言河南南陽不可問對曰河南帝城多近臣南

陽帝鄉多近親

又曰梁鴻登北邙山作五噫之歌曰登彼北邙兮噫覽觀帝京兮噫宮室崔嵬兮噫寥寥未央兮噫人之劬勞兮噫魏志曰明帝即位欲平北邙山令登觀臺見孟津廷尉辛毗諫曰天地之性高高下下今而反之既非其理若九河盛溢洪水爲害丘陵皆夷何以禦之乃止

晉書曰武帝問尙書郎虞摯三日曲水事摯曰漢章帝時平原徐肇以三月初生三女至三日俱亡一村以爲怪乃相攜至水邊洗除因流水以濫觴遂以成俗帝曰若如所說非嘉事也尙書郎束皙對曰虞摯小生未究其本此事起自周公卜成洛邑因流水泛酒故逸詩羽觴隨波流及秦昭王時三月上巳日置酒河曲遂有金人自泉而出捧水心劔於王曰令君制有西夏此即其處因立爲曲水焉

二漢相沿爲盛集帝嘉哲對

隋書曰煬帝命僕射楊素等營構宮室大業元年遂成新都而徙居之今洛陽宮是也

洛陽地圖曰鞏在洛水之間鞏固也言四面有山可以鞏固也

朱超石與兄書曰洛下道路本好青槐暎蔭可愛

陸機洛陽記曰洛陽有銅駝街漢鑄銅駝二枚在官南四會道相對俗語曰金馬門外集衆賢銅駝陌上集少年水經曰伊水東北過伊闕昔大禹疏龍門以通水兩山相對望之如闕伊水歷其間謂之伊闕

穆天子傳曰天子射鳥有獸在葭中七萃之士高賁戎擒之以獻天子命畜之東虞曰虎牢唐諱虎故改武其後又名成臯

十道志曰壽安縣漢宜陽縣也

史記曰張儀為秦說韓王曰大王今不事秦秦下甲據宜陽斷韓之上地東取成臯滎陽則鴻臺之宮非大王有也又蘇秦說韓宣惠王曰韓北有鞏成臯之固東有宛穰洧水南有陘山密縣有西有宜陽商坂之塞地方九百里帶甲數十萬

陝州

十道志曰陝州陝郡禹貢豫州之域周為二伯分陝之地即古號國地戰國時屬韓秦併天下屬三川郡

史記曰周成王時召公為三公自陝以西召公主之自陝以東周公主之

後漢書曰獻帝東歸至陝議者欲令天子浮河東下大尉楊彪曰臣弘農人從此已下東有三十六灘非萬乘所當

從乃止

史記曰芮國在今馮翊界魯桓公三年芮伯萬為母姜氏所逐遂居于魏今芮城是也

詩曰虞芮質厥成文王蹶厥生毛萇注曰虞芮之君相與爭田而久不平乃相謂曰西伯仁人盍往質焉及入境見行者讓路耕者讓畔咸相謂曰我等小人不可以履君子之庭乃相讓所爭之地以為閑田天下聞之歸周者四十餘國

唐書曰天寶元年陵郡太守李齊物鑿三門山路所通深便於漕運於所開瀆中得古鏹鉏上有古篆平陸二字由是其年改為平陸縣

山海經曰夸父之山其北有林名曰桃林廣圍三百里中多馬造公於其中得驊騮耳之乘以獻穆王

尚書曰放牛於桃林之野

桃林在靈寶縣

春秋曰處桃林之塞

太平御覽卷第一百五十九

太平御覽卷第一百五十九

州郡部五

河南道中

號

汝

鄭

宋

曹

亭

許

陳

頴

蔡

號州

十道志曰號州弘農郡禹貢豫州之域春秋為虢地七國時秦韓之境秦併天下為三川郡漢元鼎中置弘農郡左傳僖二年曰晉荀息以屈產之乘垂棘之璧以假道於虞以伐虢

應劭漢官儀云弘大也所以廣大農業也

漢志曰武帝置弘農縣於秦故函谷關山嶺下

戴延之西征記曰函者道形如函也孫卿子曰秦有松柏

之塞是也

帝王世紀曰虢有三焉周興封虢仲於西虢此其地也封虢叔於東虢即成臯是也今陝郡平陸縣是北虢

漢書曰楊僕為樓船將軍恥為關外人於是徙關新安割秦河南南陽二郡之西境於故函谷置弘農郡

漢書郊祀志曰黃帝以首山之銅鑄鼎於荆山之下後名其地為鼎湖今湖城縣也

郡國縣道記曰盧氏西虢之別也

遁甲開山圖曰盧氏山宜五穀可以避水災因山以名縣

汝州

十道志曰汝州臨汝郡禹貢豫州之域春秋時為周王畿及鄭楚之地

十三州志曰戰國時梁屬魏秦置三十六郡屬三川郡漢

為河南郡之梁縣也

左傳昭二十九年傳曰陶唐氏既衰其後有劉累學擾龍

于豢龍氏以事孔甲能飲食之夏后嘉之賜氏曰御龍一

雌死潛醢以食夏后夏后饗之而使求之懼而遷于魯縣

即魯山縣也

又曰楚白公之亂葉公率國人攻白公白公奔山縊死葉

公遂邑焉即今葉縣也

家語曰葉公好龍窻壁皆畫龍形真龍為降葉公見之而

喪魄

漢書曰漢王至成臯轅生說漢王曰漢楚相拒滎陽數歲

漢常困願君王出武關項王必引南走王深壁令滎陽成

臯且休息使韓信等輯河北地連燕齊君王乃復走滎陽

如此則楚所備者多漢得休息王從其計出兵宛葉間

左傳曰邢晉應韓武之穆也注曰應城在襄城城父縣西南
韓詩外傳曰周成王與弟戲以桐葉為珪以封汝周公曰
天子無戲言王應時而封曰應侯今應城是也

鄭州

十道志曰鄭州滎陽郡禹貢豫州之境秦兼天下為三川

帝王世紀曰黃帝都於有熊今新鄭是也

漢志曰新鄭本高辛氏火正祝融之墟

國語曰鄭桓公為司徒問於史伯曰王室多故余懼及焉

何以逃死史伯對曰王室將卑戎翟必昌不可偏也當成

周者南有荆蠻申呂應鄧陳蔡隨唐北有衛燕翟鮮虞路

泉徐蒲鮮虞姬姓路泉徐蒲皆赤翟隗姓也西有虞虢晉隗霍楊稷芮八國姬姓

也東有齊魯曹宋滕薛鄒莒是非王之父子母弟甥舅也

皆則蠻夷戎狄之人也非親作頑不可入也其濟洛河潁

之閒乎言此四水之閒可逃是其子男之國虢鄆為大虢東虢仲之

虢叔恃勢鄆仲恃險皆有淫侈怠慢之心加之以貪冒若

若以周難之故寄孥與賄焉不敢不許孥妻子也賄財也周亂而是

驕而貪必將背君君若以成周之眾奉辭伐罪無不克矣

克二邑鄆弊補舟依柔歷華君之士也言克虢鄆此若前

華後河右洛左濟主茅騶而食溱洧茅騶山名主為神也修典刑

以守之可以少固公說乃東寄孥與賄虢鄆受之十邑皆

有寄也後桓公之子武公竟取十邑之地而居之今河南新鄭是十邑謂前八邑及虢鄆

韓詩外傳曰鄭國俗以二月桃花水下時會于溱洧之上

以自被除也故詩曰溱與洧方渙渙兮

漢書曰漢王數困滎陽成臯閒計欲捐成臯以東屯鞏雒

太平御覽 卷一百五十九 三
以距楚酈食其曰夫敖倉天下轉輸久矣臣聞其下藏粟甚多楚人拔滎陽不能堅守敖倉此天所以資漢願足下急進兵攻滎陽據敖倉之粟即天下知所歸矣

晉書曰阮籍嘗登廣武見劉項戰處歎曰時無英主使豎子成名其地在滎陽

地道記曰陽武滎陽有博浪沙張良爲韓擊秦始皇處

京二邑 宋州

十道志曰宋州睢陽郡理宋城縣虞舜十二州爲豫州之境周爲青州之域武王封微子之邑後爲齊楚魏所滅三分其地魏得其梁陳留齊得濟陰東平楚得沛梁卽今州也

禮記曰武王克殷下車而封殷之後於宋禹貢曰導荷澤被孟豬孟豬澤在今虞城縣明都澤是

博物志曰宋北至泗水南迄睢渦有孟豬之澤碭山之基元和郡國志曰秦併天下改爲碭郡後改爲梁國漢文帝封子武爲梁王自漢至晉爲梁國屬豫州宋改爲梁郡隋於睢陽置宋州

唐書曰天寶末祿山亂兩河郡縣多所隱沒張巡許遠守睢陽賊將尹子奇併力攻圍踰年不下城中食盡育爲賊所陷巡等抗詞不撓遂被害

陳留風俗傳曰宋之地猶有先王遺風重厚多仁好稼穡惡衣食以致畜藏

史記曰梁孝王築東苑三百里是曰兔園又爲複道自宮屬諸平臺三十餘里

圖經曰梁王有脩竹園園中竹木天下之選集諸方遊士各爲賦故館有鄒枚之號又有鴈鷺池周迴四里亦梁王

所鑿又有清冷池有釣臺謂之清冷臺

漢志曰寧陵屬陳留莽曰康善孟康曰故葛伯國今葛鄉是也

漢書曰梁孝王武以孝文十二年徙梁梁為大國居天下膏腴地北界泰山西至高陽四十餘城多大縣於是孝王築東苑方三百餘里廣睢陽城七十里大治官室為複道自宮連屬於平臺四十餘里

曹州

十道志曰曹州濟陰郡置在濟陰縣禹貢豫州之域周為曹國地後屬宋七國時屬齊漢為濟陰郡地在濟水之南故以為名曹詩曰蒼兮蔚兮南山朝躋曹南山也左傳僖二十八年曰晉侯圍曹門焉多死曹人尸諸城上陳晉死人於城上晉侯患之聽輿人之謀曰移舍於墓言將發冢曹人

兇懼因其兇也而攻之入曹而分曹衛之田以賜宋人晉侯有疾曹伯之豎侯孺貨筮史使曰以曹為解齊桓公為會而封異姓今君為會而滅同姓曹叔振鐸文之昭也先君唐叔武之穆也且合諸侯而滅兄弟非禮也公說復曹伯

尚書曰夏師敗績遂伐三醜俘厥寶玉孔曰三醜國名今定陶也

水經曰荷水俗謂之五丈溝東經定陶

漢書曰高祖五年春二月甲午即皇帝位於定陶汜水之陽左傳曰衛孫蒯田于隧飲馬于重丘重丘人毀瓶因詬之

重丘今乘氏縣

亳州

十道志曰亳州譙郡置在譙縣禹貢豫州之域春秋時陳國之譙邑六國時屬楚秦為碭郡地漢為譙縣屬沛郡

杜注焦今譙國

左傳曰楚成得臣帥師代陳遂取焦夷

史記曰周武王封神農之後於譙國
漢書地理志曰王莽以譙為延成亭
魏志曰後漢熹平五年黃龍見譙太史令單颺以為其國
當有王者興不及五十年亦當復見及文帝即位果如其
言以先人舊都立為譙國與長安許昌鄴洛陽號為五都

元和郡縣志曰後魏立南兗州周武改為亳州
魏略曰太祖於譙東五十里澤中築起精舍讀書射獵閉
絕賓客即謂之譙東

史記曰老子苦縣人也苦縣即今真源縣也

單州

五代史曰單州本單父縣梁為輝州後唐同光二年復舊
隸宋州周廣順中割隸曹州

史記曰處不齊字子賤為單父宰反命於孔子曰國有賢
者賢不齊者五人教不齊所以治者孔子曰惜哉不齊所
治者小所治者大則庶幾矣
呂氏春秋曰宓子賤治單父彈鳴琴身不下堂而單父治

許州

十道志曰許州許昌郡禹貢豫州之域周為許國
左傳曰許太岳之胤也
說文曰許炎帝之後也武王伐紂時封之
漢志曰潁川許縣舊許國也
魏略曰後漢建安元年太祖迎獻帝都於許即此邑也魏
文帝即位改許昌縣焉

左傳曰鄭伯請釋泰山之祀而祀周公以泰山之祊易許
田今有魯故城在長社縣

後漢書曰宋寵為潁川太守問功曹鄭凱曰聞貴郡山川多產奇秀前賢往哲可得聞乎凱對曰鄙郡稟嵩高之靈中岳之精是以聖賢龍蟠俊乂鳳集昔許由巢父恥受堯禪洗耳河濱重道輕帝邈世高蹈樊仲父者志潔心遐恥山河之功賤天下之重抗節參雲公儀許由俱出陽城留侯張良奇謀輔世玄筭入微濟生民之命恢帝王之略功成而不居爵厚而不受出于城父胡元安體魯參之至行履樂正之純業喪親泣血骨立形存精神通於神明雉兔集於左右出潁陽彪義山英姿秀偉逸才挺出究孔子之房隩存文武於將墜出於昆陽杜伯夷經學著於師門政事熙於國朝清身不苟有於陵之操損己存公有公儀之節出定陵

又曰獻帝建安元年遷都許

魏略曰黃初五年文帝東征留郭后於永始臺霖雨百餘日城樓多壞有司請移后曰昔楚昭王出遊貞姜留漸臺江水至使者迎而無符不出卒沒今帝在遠未有急奈何移也又景福殿賦曰鎮以崇臺寔曰永始臺在許昌縣魏志曰荀彧字文若潁川潁陰人也董卓之亂彧謂父老曰潁川四戰之地天下有變當為兵衝宜亟去無久留鄉人多懷土猶豫會冀州牧韓馥迎彧獨將宗族至冀州後董卓遣李傕等出關東所過虜掠至潁川鄉人留者多見殺略

陳州

十道志曰陳州淮陽郡置在宛丘縣

元和郡國圖曰禹貢豫州之域本太昊之墟周武王封媯滿於陳春秋時楚滅之秦滅楚屬潁川郡漢高分置淮陽

國後漢改為陳國漢文之秦滅楚國陳以濉水為界
毛詩陳風曰坎其擊鼓宛丘之下大吳之縣風光王注
又曰東門之池可以漚麻注水經曰東門池水至清而不
耗不生諸草東漢

爾雅曰陳有宛丘又曰丘上有丘為宛丘

漢書曰高帝十一年立于友為淮陽王罷潁川郡以益之
七賢傳曰漢武出淮陽到監鄉帝問陳翼曰此名為何翼
曰監鄉曰曰何歟乎翼曰臣言不欺若不欺佩刀當生白
毛若欺則無毛視之刀果有毛監鄉在阜之南

潁州

十道志曰潁州汝陰郡置在汝陰縣帝立潁川郡以益之
元和郡縣圖曰禹貢豫州之域春秋胡子國楚滅之秦併
天下為潁州郡在漢州則汝南郡之汝陰縣也魏晉於此

置汝陰郡後魏改置潁州

毛詩曰遵彼汝墳伐其條枚

史記曰蒙恬伐楚寢丘今汝陰縣有寢丘故城在焉

呂氏春秋曰楚孫叔敖戒其子曰我死王必封汝無受利
地荆楚之間有寢丘其地為不利可長有也其子從之楚
功臣封二葉而滅唯寢丘不奪一名沉丘

蔡州

十道志曰蔡州汝陽郡禹貢豫州之地

圖經曰春秋時為沉蔡二國之地後為楚魏二國之境秦
兼天下以其地為三川漢為汝南郡地形志曰謂之懸瓠
城亦名懸壺城又水經曰汝水周城形如懸瓠故取名焉
史記曰周武王克殷封叔度於蔡挾武庚作亂周公殺管
叔而放蔡叔與車七乘子改行率德周公聞之舉胡以為

魯卿士故魯國治復封胡于蔡是為蔡仲。輿地志曰新蔡縣平侯自上蔡徙都之故曰新蔡。
 漢志曰汝南郡高帝置王莽曰汝汾。
 又曰鮦陽屬汝南郡在鮦水之陽也鮦音紂紅反。
 又曰吳房本房子國也楚靈王遷房于楚吳王闔閭弟夫槩王犇楚楚封於此為堂谿氏以封吳故曰吳房。
 史記蘇秦說韓王曰韓之劔戟出堂谿。
 又曰李斯上蔡人也二世二年七月具斯五刑論要斬咸陽市斯出獄與其中子俱執顧謂子曰吾欲與客復牽黃犬出上蔡東門逐狡兔可得乎。
 後漢書曰許劭字子將汝南平輿人也兄虔亦知名汝南人稱平輿淵有二龍焉。
平輿故城今蔡州汝陽縣東北有二龍鄉月旦里
 太平御覽卷第一百五十九

太平御覽卷第一百六十

州郡部六

河南道下

滑	濮	濟	鄆	青
齊	淄	萊	登	密
徐	泗	兗	海	沂

滑州

十道志曰滑州靈昌郡置在白馬縣禹貢兗州之域春秋時衛地戰國時屬魏秦為東郡地

左傳曰狄滅衛衛立戴公以廬于曹。
今白馬地也
 衛文公自

曹邑遷于楚丘。
今衛南縣也
 衛成公又遷于帝丘。
今濮陽縣

史記曰秦始皇五年拔魏十五城始置東郡

漢志曰白馬屬東郡

又曰酈食其說沛公曰守白馬之津以示諸侯形制之勢則天下知所歸矣

西征記曰古有神白馬因以名縣

又開山圖曰白馬群行水上悲鳴則河決馳走則山崩後漢書曰樊儵封燕侯即東郡也

濮州

十道志曰濮州濮陽郡置在鄆城縣禹貢兗州之域春秋時衛地戰國時屬齊秦併天下即東郡地在漢為濟陰郡之鄆城縣

左傳曰齊桓公會諸侯于鄆杜注曰衛邑今東郡鄆城是也

史記曰齊威王九年趙伐我取鄆

左傳曰衛侯夢於北宮見人登昆吾之墟注云衛有觀在昆吾之墟今濮陽城是

史記曰舜耕于歷山耕者讓畔應劭曰歷山即雷澤中山也

水經曰昔師延為紂作靡靡之樂武王伐紂延東走自投濮而死衛靈公將之晉舍於濮水之上夜聞歌聲召師涓受之

濟州

十道志曰濟州濟陽郡置在盧縣禹貢兗州之域春秋時其地屬齊秦兼天下為東郡在平地桂音仕

左傳曰齊鄭盟于石門尋盧之盟杜注曰今盧縣故城是史記曰扁鵲生盧故曰盧醫

酈元注水經曰碻磈城西即故在平縣城碻磈即今州是也沉約宋書作敲噐字

宋書曰元嘉七年到彥之北征拔碻磈後失之至二十七年以王玄謨為寧朔將軍先鋒入河平之於此固守因置

稿礮城

郡國志曰後魏置濟州於單于城中即石勒於耕處聞鼓角之聲是此

圖經曰東阿春秋時齊之祠地也郡國志曰其地出繒縑故秦王服阿縞

十道志曰石窰在長清縣

左氏傳曰齊晉戰于鞍齊師敗績齊侯自徐關入見女子日君免乎日免銳司徒免乎日免既而問之壘司徒之妻也與之石窰

鄆州

十道志曰鄆州東平郡置在須昌縣元和郡縣圖曰禹貢兗州之域春秋時屬宋即魯附庸須句國句音戰國時其地屬魏秦為薛郡地漢為東平國

左傳曰晉人執季文子於茗丘公還待於鄆杜注曰鄆魯西邑

又僖二十二年伐邾須句僖公時也

又哀十四年西狩于大野叔孫氏之車子鉏商獲麟賜虞人大野即鉏野縣

青州

十道志曰青州北海郡置在益都縣

元和郡縣志曰少昊之墟古青州之地舜時以青州越海遼遠分為營州武王克商封師尚父於齊營丘周成王少

時命太公東至于海西至河南至于穆陵北至于無棣五侯九伯實得征之後子孫為秦所滅分齊地置齊瑯琊二

郡漢為臨淄郡

圖經曰少昊之代爽鳩氏虞夏則有季荊仕則反湯有逢公

伯陵逢音蒲江反殷末有蒲姑皆為諸侯國於此地周成王時蒲姑與四國作亂成王滅之以封太公

史記曰齊有清濟濁河可以為固長城鉅防足以為塞

又曰蘇秦東說齊宣王曰齊南有泰山東有瑯琊西有清

河北有渤海此所謂四塞之國也齊地方二千餘里齊軍

之良進如鋒矢戰如雷霆解如風雨即有軍役未嘗倍泰

山絕清河涉渤海也臨淄甚富其民無不吹簫鼓瑟彈琴

擊筑鬪雞走狗臨蓄之塗車載相擊人肩相摩連袵成帷

舉袂成幕揮汗成雨家給人足志氣高揚

又曰齊所以名齊者有天齊祠也

又封禪書曰始皇遊海上祠名山大川及八神求羨門之

屬八神一日天主祠天齊天齊池名在臨淄南郊山下

漢書曰夫齊東有瑯琊即墨之饒南有泰山之固西有濁

河之限北有渤海之利地方二千里持戟百萬懸隔千里

之外齊得十二焉

又曰齊有三服之官綺為首服紈素為冬服輕綃為夏服

韓詩外傳曰齊景公遊於牛山之上北望齊國曰美哉國

乎鬱鬱葱葱使古人無死者則寡人將何去此俯而泣下

沾襟國子高子曰然臣賴君之賜蔬食惡肉可得而食也

駑馬柴車可得而乘也且猶不欲死而況君乎又俯而泣

晏子笑曰樂哉今日之遊宴也見怯君一諛臣二使古而

無死則太公丁公至今猶存吾君方將被蓑笠而立畝畝

惟農事之恤何暇念死乎公慙乃引觴自罰

韓子曰景公與晏子遊於少海登柏寢之臺而望其國曰

美哉堂堂乎後代孰有此晏子曰其田氏乎公曰寡人有

國而田氏有之奈何對曰君欲奪之則近賢遠不肖振窮

邱孤雖十田氏其如君何

齊記曰晉永嘉五年東萊牟平曹嶷為刺史所築城有大澗甚廣因之為固謂之廣固城側有五龍口
崔鴻十六國春秋南燕錄曰慕容德初議所都尚書潘聰曰青齊沃壤號曰東秦土方二千里四塞之固負海之饒可謂用武之國廣固者曹嶷之所營山川險峻足為王者之都從之

齊州

十道志曰齊州濟南郡置在歷城縣古兗州之域

周禮曰子為玄枵齊之分

左傳曰晉平公伐齊戰于歷下

史記曰舜耕于歷山

竹書穆天子傳曰天子自五鹿東征釣於漯水以祭淑人

己巳天子東征飲于漯水之上漯水在祝阿即今禹城縣

郡國縣道記曰章丘古高唐縣也春秋時齊邑

史記曰齊威王使盼子守高唐趙人不敢東漁于河

淄州

十道志曰淄州淄川郡置在淄川州縣禹貢青州之域周之九州為幽州之境春秋及戰國時屬齊秦為齊郡漢為濟南郡之般陽縣

漢志曰般陽屬濟南郡應劭曰在般水之陽王莽曰濟南亭

圖經曰長山縣本漢於陵縣也隋改焉以界內長白山為名

漢志曰於陵屬濟南郡王莽曰於陸

郡國志曰長山於陵城散宜生得瑞獸之地

萊州

十道志曰萊州東萊郡置在掖縣禹貢青州之域周之九州為幽州之境秦置三十六郡屬齊郡漢志高祖置東萊以其在齊國之東故云東萊

尚書禹貢曰萊夷作牧

左傳曰齊侯伐萊萊人使正輿子賂夙沙衛以索馬牛皆百疋齊師乃還後齊人復入萊萊恭公浮柔犇堂晏弱圍堂滅之遷萊子於卿

史記曰周武王封太公於營丘萊侯聞之遂與太公爭營丘

左傳曰聊攝以東姑尤以西其為人也多矣聊攝齊西界姑尤齊東界

謂聊城攝城姑尤水也水在即墨縣也

漢書郊祀志曰武帝元封元年大旱禱萬里沙孟康曰沙

長三百里沙在郡界

地里志曰長廣縣有獫養澤

周禮職方氏曰幽州之藪曰獫養長廣今昌陽縣

登州

十道志曰登州文登郡漢牟平縣屬東萊郡文帝封齊悼惠王子將閭為牟平侯此即將閭邑也圖經曰古萊子國也戰國及秦屬齊郡漢已下屬東萊郡

又曰文登漢睡縣有之罘山師古曰睡直睡切

漢書曰睡有之罘山丹水所出

史記曰始皇二十八年行郡縣上泰山過黃睡經成山後

二十九年又東遊登成山升之罘勒石紀功

密州

十道志曰密州高密郡置在諸城縣禹貢青州之域兼得

徐州之地秦爲瑯琊郡漢屬齊文帝分齊立膠西國封齊悼惠王子卬爲膠西王都高密

齊記曰密州本東武縣樂府東武吟卽是也

秦本記曰始皇二十六年至齊遂登瑯琊層臺於山上秦王樂之因留三月乃徙黔首二萬戶於瑯琊山

吳越春秋曰越王勾踐二十五年徙都瑯琊立觀臺周旋七里以望東海

史記曰齊湣王爲燕師所敗唯聊莒卽墨三城不下立湣王之子法章於莒是爲襄王

徐州

十道志曰徐州彭城郡置在彭城縣

元和郡縣圖曰禹貢徐州之域春秋時宋滕薛小邾偃陽之地六國時屬楚秦併天下爲泗水郡楚漢之際楚懷王

自盱眙徙都之後項羽徙懷王于郴自立爲西楚霸王又都於此漢爲泗水郡後爲彭城郡

漢書曰高祖過沛留置酒沛宮悉召故人父老子弟佐酒發沛中兒得百二十人教之歌酒酣上擊筑自歌大風之歌令兒皆習和之上乃起舞愴慨泣下謂沛父老曰遊子悲故鄉吾雖都關中萬歲之後吾魂魄猶思沛

宋書曰高祖經略中原以彭城險要置府於此後王玄謨上表曰彭城南屆大淮左右清汴城隍峻整襟衛周又自淮以西襄陽以北經塗三千達于濟岱六州之民三十萬戶實由此境

後魏書曰尉元上表曰彭城宋之要藩南師來侵莫不因之以凌諸夏

泗州

元和郡縣圖曰泗州臨淮郡理臨淮縣禹貢徐州之域春秋屬魯又為徐子之國後秦滅楚為泗水郡漢分置臨淮郡
漢書地理志曰魯猶屬臨淮郡王莽曰康義公音仇即連水也
都城記曰周穆王末徐君偃好行仁義東夷歸之者四十餘國穆王西巡聞徐君威德日遠遣楚襲其不備大破之殺偃王其子遂北徙彭城百姓從之者數萬徐國今徐城是也

兗州

十道志曰兗州魯郡置在瑕丘縣

元和郡縣圖曰禹貢兗州之域春秋時為魯國武王即位封周公於少昊之墟曲阜之地周公不就封至子伯禽乃就封之後三十四君為楚所滅楚以魯為薛郡初為魯國

魏太祖為兗州牧焉

左傳曰季康子伐邾以邾子益來囚諸負瑕杜注云魯邑也有瑕丘城即今縣

家語曰夫子為中都宰今有中都城在焉

漢書曰高祖略地取湖陵方輿地志屬山陽郡即今方輿縣也

左傳曰隱公矢魚于棠即此地唐或為魚臺縣

漢書曰吳楚七國反天子命周亞夫將三十六軍擊之亞夫至淮陽問客鄧都尉策安出客曰莫若引兵東北壁昌

邑以梁委吳使輕兵絕淮泗口塞吳饒道使吳梁相弊乃

以全制其極破吳必矣亞夫從之乃破吳今金鄉縣有昌邑故城

魏志曰太祖欲征陶謙時呂布在兗州荀彧說太祖曰昔

高祖居關中光武據河內皆深根固蒂以制天下進足勝

敵退足以自守故雖有困敗而終濟大業將軍本以兗州首事平山東之難百姓無不歸心悅服且濟河天下之要地是亦將軍之關中河內也不可先定乃從之

魯國之東境七國時屬楚秦為薛郡地後分薛郡為郟漢改郟為東海郡

十道志曰海州東海郡置在朐山縣禹貢徐州之域春秋魯國之東境七國時屬楚秦為薛郡地後分薛郡為郟漢改郟為東海郡

漢書曰朐屬東海郡秦始皇立石海上以為東門

又曰東海郡祝其羽山在南縣所殛之地王莽曰猶亭

左傳曰公會齊侯于夾谷即此

沂州

十道志曰沂州琅琊郡置在臨沂縣禹貢徐州之域也春秋時齊地秦置琅琊郡

論語夫子曰點爾何如曰暮春者春服既成冠者五六人童子六七人浴乎沂風乎舞雩詠而歸夫子喟然歎曰吾與點也。又曰子之武城聞絃歌之聲夫子莞爾而笑曰

割雞焉用牛刀武城今在費縣

又曰公山弗擾以費叛召子欲往子路不說曰末之也已何必公山氏之之也之適也無可之則止何必公山氏之適

漢地理志曰襄賁屬東海郡王莽曰章信後屬琅琊郡音貴肥

太平御覽卷第一百六十

著此應志曰襄貴顯東所據王莽曰章曰身誠
 所必公山丸之也
 又曰左山也
 陳...
 童...
 備...

